

Pa ilustra graficamente

AWEMainta ta presenta mas foto di apertura di Aña Academico di IPA

SIN duda algun, e apertura e aña aki di Aña Academico di Instituto Pedagogico Arubano (IPA) tabata uno impresionante. Banda di discurso di apertura di Directora General, drs. Ava Thode, mester bisa cu esun di e orador invita, di prof. Dr. Lewis Gordon di Temple University of Philadelphia tambe a hala atencion. Fuera di entrega di propedeuse y certificado di fase integrativo, tabatin presentacion di personal y hubilacionan.

Un tradicion di tur aña na IPA t'e eleccion di docente di aña cu ta wordo escogi dor di studiantenan y colega docente di IPA. E aña aki tambe a opta pa eligi un colega di aña, cu ta inclui tur docente y personal di sosten di IPA. Docente di aña 2008-2009 a keda den persona di Cheryda

Gemin, docente di Hulandes. Colega di aña a keda den persona di sra. Greta Nicolaas, directie secretaresse di IPA, kende ta wordo considera un colega ehemplar y semper cla pa yuda.

E anochi aki a conoce tambe varios sorpresa. Un di e sorprendanan tabata e presentacion y entrega di un serie di 7 buki na Papiamento cu a wordo produci y publica danki na financiamiento di Fondo Desaroyo Aruba (FDA). Sra. Joyce Pereira y sra. Swinda Schwengle a presenta e serie di buki y a haci entrega di e bukinan na sra. Ava Thodé y sra. Ingrid Gietel.

Riba e anochi aki tambe a haci presentacion inoficial di e areanan nobo di e instituto. IPA a dedica e areanan nobo y renoba

na 3 dama cu a traha incansabel pa IPA y pa enseñansa en general.

Ta trata aki di sra. Maybeline Arends – Croes, sra. Nita Semerel q.e.p.d., y sra. Madonna Stephens. Di e manera aki IPA kier honra e gran esfuerso y trabao cu e damanan aki a haci pa IPA y pa enseñansa na Aruba. Awe IPA conoce Plaza Maybelinne Arends – Croes, Café Nita, y Onderwijs werkplaats Madonna Stephens. Parti di e presentacion di e areanan renoba tabata e desvelamento di e plakaatnan na nomber di e 3 damanan cu a wordo honra. E tabata un anochi masha ameno, pa cual recibi un biaha mas nos felicitacion y tur clase di éxito den e Aña Academico nobo aki 2009-2010.

